

VENDIM
Nr. 21, datë 19.2.2024

MBI ZGJIDHJEN E MOSMARRËVESHJES NDËRMJET SHOQËRISË “SUN BEAT SYSTEM” SHPK DHE SHOQËRIVE “FURNIZUESI I TREGUT TË LIRË” SHA DHE “OPERATORI I SISTEMIT TË SHPËRNDARJES” SHA

Në mbështetje të nenit 16 dhe 20, geramat “a” dhe “ë”, nenit 24, pikat 1, 2, 3, të ligjit nr. 43/2015, “Për sektorin e energjisë elektrike”, të ndryshuar; të neneve 15 dhe 23, të “Rregullores për organizimin, funksionimin dhe procedurat e ERE-s”, të miratuar me vendimin e Bordit të Entit Rregullator të Energjisë (ERE), nr. 96, datë 3.9.2016; të nenit 11, pika 4, të “Rregullores për trajtimin e ankesave të paraqitura nga klientët dhe për zgjidhjen e mosmarrëveshjeve midis të licencuarve, në sektorin e energjisë elektrike dhe të gazit natyror”, miratuar me vendimin e Bordit të ERE-s nr. 114, datë 8.7.2016; në mbledhjen e tij të datës 19.2.2024, mbasi shqyrtoi relacionin me nr. 4/1 prot., datë 7.2.2024, të Grupit të Punës, “Për zgjidhjen e mosmarrëveshjes ndërmjet shoqërive ‘Tren Sun System’ sh.p.k., ‘Sun Beat System’ sh.p.k., ‘NTSP’ sh.p.k., ‘Korça Photovoltaic Park’ sh.p.k. dhe shoqërive ‘Furnizuesi i Tregut të Lirë’ sh.a. dhe ‘Operatori i Sistemit të Shpërndarjes’ sh.a.

konstatoi se:

- Bordi i ERE-s, me vendimin nr. 319, datë 8.11.2023, ndër të tjera vendosi: 1. Pranimin për shqyrtim nga ERE të kërkesës së paraqitur nga shoqëritë “Tren Sun System” sh.p.k., “Sun Beat System” sh.p.k., “NTSP” sh.p.k., “Korça Photovoltaic Park” sh.p.k., për zgjidhjen e mosmarrëveshjes ndërmjet shoqërive dhe shoqërisë “FTL”, duke filluar procedurën për zgjidhjen e mosmarrëveshjes, në përputhje me “Rregulloren për trajtimin e ankesave të paraqitura nga klientët dhe për zgjidhjen e mosmarrëveshjeve midis të licencuarve, në sektorin e energjisë elektrike dhe të gazit natyror” miratuar me vendimin e Bordit të ERE-s nr. 114, datë 8.7.2016.

- Shoqëria “Sun Beat System” sh.p.k. është licencuar nga ERE për aktivitetin e prodhimit të energjisë elektrike dhe mban licencën nr. 519, seria P22, dhënë me vendimin e Bordit të ERE-s nr. 193, datë 21.7.2022. Shoqëria, me shkresën e protokolluar në ERE me nr. 1919/3 prot., datë 23.10.2023, ndër të tjera kërkon: “njohjen dhe blerjen e energjisë së prodhuar për periudhën 28.7.2022 deri më 8.11.2022... trajtimin e mëtejshëm të kërkesës sonë nga institucioni juaj”.

- Shoqëria FTL sh.a. është licencuar nga ERE në aktivitetin e furnizimit të energjisë elektrike dhe mban licencën nr. 423, seria F18/F23, dhënë me vendimin e Bordit të ERE-s nr. 199, datë 3.9.2018, dhe rinovuar me vendimin e Bordit të ERE-s nr. 121, datë 4.4.2023. Shoqëria “FTL” sh.a., nëpërmjet shkresave si vijon, ka parashtruar:

- Me shkresën me nr. 2834/2 prot., datë 11.10.2023, drejtuar shoqërisë “Sun Beat System” sh.p.k., ka parashtruar si vijon: “për periudhën e kërkuar 28.7.2022 – 8.11.2022, shoqëria “FTL” sh.a. nuk ka pasur kontratë shitblerje të energjisë elektrike me shoqërinë “Sun Beat System” sh.p.k.. Kontrata ndërmjet “Sun Beat System” sh.p.k. dhe “FTL” sh.a. me nr. 906/1 prot., për shitblerjen e energjisë elektrike të prodhuar nga centrali fotovoltaike, është lidhur më datë 28.4.2023, dhe ka hyrë në fuqi më datë 2.5.2023, datë e cila korrespondon me fillimin e operimit/lëvrimit të energjisë elektrike, siç përcaktuar në aneksin e kontratës.

- Në datën 26.9.2023, ERE organizoi një seancë dëgjimore, mes përfaqësuesve të shoqërive “Tren Sun System” sh.p.k., “Sun Beat System” sh.p.k., “NTSP” sh.p.k., “Korça Photovoltaic Park” sh.p.k., si dhe përfaqësuesve të shoqërive “OSSH” sh.a., “FTL” sh.a.. Objekti i kësaj seance dëgjimore konsistonte në trajtimin e problematikës së ngritur nga shoqëritë “Tren Sun System” sh.p.k., “Sun Beat System” sh.p.k., “NTSP” sh.p.k., “Korça Photovoltaic Park” sh.p.k., mbi prodhimin e lëvruar dhe të pakontraktuar nga njësitë gjeneruese fotovoltaike në zotërim të këtyre shoqërive.

- Më datë 21.11.2023, ERE organizoi përsëri një seancë të dytë dëgjimore, mes përfaqësuesve të shoqërive të mësipërme dhe të shoqërive “OST” sh.a., “OSSH” sh.a., “FTL” sh.a., si dhe përfaqësuesve të ERE-s. Në këtë seancë dëgjimore “FTL” sh.a. parashtrroi se vlerëson që nuk është palë në këtë mosmarrëveshje, dhe se kjo mosmarrëveshje është ndërmjet shoqërive prodhuese fotovoltaike “Tren Sun System” sh.p.k., “Sun Beat System” sh.p.k., “NTSP” sh.p.k., “Korça Photovoltaic Park” sh.p.k., dhe shoqërisë “OSSH” sh.a.

- Në të njëjtën kohë, ERE bëri me dije se të gjithë pjesëmarrësit në seancën dëgjimore janë thirrur duke marrë në konsideratë detyrimet ligjore që ka secila shoqëri/pjesëmarrëse në seancë. Vendimi i Këshillit të Ministrave (VKM) nr. 456, datë 29.6.2022, “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike” ndër të tjera në nenin 12, pika 2 dhe pika 3, përcakton se: “2. Detyrimi i shërbimit publik për blerjen e energjisë elektrike nga burimet e rinovueshme të energjisë i vendoset Shoqërisë Publike të Furnizimit në Tregun e Lirë, në përputhje me legjislacionin në fuqi dhe kontratën tip, të miratuar nga ERE. Shoqëria publike e prodhimit ka të drejtë të lidhë kontratë blerjeje të energjisë elektrike nga burime të rinovueshme që shërbejnë për diversifikimin e prodhimit e saj. 3. Shoqëria Publike e Furnizimit në Tregun e Lirë, deri në krijimin e operatorit të energjisë së rinovueshme dhe krijimin e tregut të ditës në avancë, do ta tregtojë këtë energji për mbulimin e humbjeve të Operatorit të Sistemit të Shpërndarjes, me të njëjtin çmim me të cilin e blen këtë energji nga prodhuesit me përparësi të energjisë elektrike, deri në përfundimin e kontratave të shitblerjes së energjisë.

- Në seancë, shoqëria “OST” sh.a. bëri me dije se aktrakordimet për energjinë elektrike të prodhuar ku përfshihet edhe energjia elektrike e prodhuar nga prodhuesit me përparësi nënshkruhen ndërmjet shoqërive “OST” sh.a., “FSHU” sh.a dhe “FTL” sh.a /”OSHEE GROUP” sh.a., për energjinë elektrike të transmetuar nga “OST” sh.a. për llogari të “FSHU” sh.a. dhe “FTL” sh.a/”OSHEE GROUP” sh.a.

- Në këto rrethana, vlerësohet se shoqëria “FTL” sh.a. është palë në këtë mosmarrëveshje duke marrë në konsideratë përcaktimet e sipërcituara të VKM-së nr. 456/2022, si dhe faktin që është pjesëmarrëse në aktrakordimet për energjinë elektrike të prodhuar dhe të rakorduar ndërmjet palëve. Gjithashtu, duke qenë se pika 3 e VKM-së nr. 456/2022, përcakton se “FTL” sh.a. e tregon këtë energji për mbulimin e humbjeve të Operatorit të Sistemit të Shpërndarjes, me të njëjtin çmim me të cilin e blen këtë energji nga prodhuesit me përparësi të energjisë elektrike, edhe “OSSH” sh.a. është palë në shqyrtimin e kësaj mosmarrëveshje.

- Në vijim të detyrave të lëna në seancën dëgjimore të datës 21.11.2023, shoqëria “FTL” sh.a., me shkresën nr. 3408/1 prot., datë 21.11.2023, ka përcjellë në ERE: i. kontratat për secilën shoqëri; ii. procesverbalet e verifikimit fillestar të sistemit të matjes për secilën shoqëri; iii. komunikimet shkresore ndërmjet palëve; iv. kërkesat e shoqërive “Tren Sun System” sh.p.k., “Sun Beat System” sh.p.k., “NTSP” sh.p.k., “Korça Photovoltaic Park” sh.p.k. drejtuar shoqërisë “FTL” sh.a., lidhur me prodhimin e munguar dhe të pa kontraktuar nga njësitë gjeneruese fotovoltaike respektive; dhe v. aktrakordim tre palësh për muajin korrik, gusht, shtator, tetor, nëntor, dhjetor – viti 2022.

- Rezulton se nga procesverbalet e instalimit/verifikimit të sistemit të matjes të vënë në dispozicion nga “FTL” sh.a. dhe shoqëritë prodhuese janë hartuar për sistemin e matjes për shoqëritë ankuuese dhe janë përgatitur nga “OSSH” sh.a./“OSHEE Group” sh.a. për secilën shoqëri me numër serial unik dhe janë të datës 28.7.2022.

- Në vijim nga vlerësimi periodik i sistemit të matjes në procesverbalet e datës 8.9.2022, nga ku rezulton se: a) Procesverbali i hartuar për sistemin e matjes për shoqërinë “Sun Beat System” sh.p.k., i përgatitur nga “OSSH” sh.a./“OSHEE Group” sh.a. ka numrin serial 5176617 dhe është i datës 8.9.2022. Në këtë procesverbal evidentohet se është vendosur karta sim për transmetimin e të dhënave *online*, ku ndër të tjera, evidentohet se matësi rezultoi i rregullt.

- Vlerësimet në sistemin e matjes të rakorduar nga Procesverbalet e mbajtura në datat i. 1.10.2022; ii. 1.12.2022; dhe iii 1.1.2023, për secilën shoqëri me numër serial unik evidentohet se: Nga verifikimi i kryer u konstatua se matësi është brenda kushteve teknike. Në procesverbalet e sipërcituara evidentohet se: i. Për shoqërinë “Sun Beat System” sh.p.k. numri i serisë së matësit është 217325921.

- Shoqëria “FTL” sh.a., ka përcjellë në ERE në dokumentacionin përkatës dhe procesverbalet e sistemit të matjes ndërmjet “FTL” sh.a./“OSHEE GROUP” sh.a. dhe shoqërive “Tren Sun System” sh.p.k., “Sun Beat System” sh.p.k., “NTSP” sh.p.k., “Korça Photovoltaic Park” sh.p.k. të cilat janë nënshkruar në datën 2.5.2023.

- Ndërkohë dokumentacioni i përcjellë nga shoqëria “OSSH” sh.a. me shkresës nr. 12149/3 prot., datë 28.12.2023, protokolluar në ERE me nr. 4 prot., datë 3.01.2024, përfshinë për secilën shoqëri ankuese: i. Formular prezantimi të kërkesës, ankesës; ii Procesverbalet e mbajtura nga “OSSH” sh.a./“OSHEE Group” sh.a.; iii. Parametrat e konfigurimit; dhe iv. urdhrat e punës.

- Ligji nr. 43/2015, “Për sektorin e energjisë elektrike”, i ndryshuar, në nenin 76, “Matja e energjisë elektrike”, pika 1, përcakton se: Operatorët e sistemit të transmetimit dhe të shpërndarjes janë përgjegjës për veprimtarinë matëse dhe shërbimin e leximit të matësve në rrjetet e tyre përkatëse.

- Shoqëria “OSSH” sh.a. në përputhje me këto përcaktime ligjore bazuar në procesverbalet e mbajtura për shoqëritë “Tren Sun System” sh.p.k., “Sun Beat System” sh.p.k., “NTSP” sh.p.k., “Korça Photovoltaic Park” sh.p.k., në datën 28.7.2022, ka vulosur sistemin matës të shoqërive dhe në rubrikën me emërtesën “shënime/veprimi i kryer” të procesverbaleve respektive ka shënuar: Në panel u vulosën transformatorët e rrymës, transformatorët e tensionit, morseteria e matësit, boksi i matësit.

- Rezulton se në procesverbalet e mbajtura nga “OSSH” sh.a./“OSHEE Group” sh.a., sistemi i matjes së energjisë elektrike në të katërta shoqëritë prodhuese është instaluar në datën 28.7.2022 dhe në mënyrë periodike është lexuar nga shoqëria “OSSH” sh.a. energjia elektrike e prodhuar dhe e regjistruar në këto matës. Gjithashtu, në këto procesverbale është shënuar në çdo rast se: Nga verifikimi i kryer u konstatua se matësi është brenda kushteve teknike. Këto elemente të cilët tregojnë se sistemi i matjes ka qenë funksional dhe brenda kushteve teknike.

- Për rrjedhojë rezulton se energjia elektrike e prodhuar për periudhën 28.7.2022 deri më 8.11.2022 është e matur në një sistem matje i cili në çdo verifikim të bërë nga operatori i rrjetit përkatës (OSSH sh.a.) rezulton se është brenda kushteve teknike.

- Në procesverbalet e mbajtura më datë 8.9.2022, nga “OSSH” sh.a., gjithashtu përcaktimet për të katërta shoqëritë janë të njëjta, ku evidentohet se para hapjes së vulave: Matësi në rregull, në ekran displei i matësit diagram rezulton në krah të kundërt energjia e prodhuar shihet si e konsumuar.

- Në rubrikën shënime veprimi i kryer: U hap boksi dhe morseteria e matësit për t’iu vendosur karta sim për transmetimin *online* të të dhënave. Ju bë dhe diagrami vektorial ku matësi rezultoi i rregullt. Matësit iu bë ndryshimi i koeficientit, nga koeficient i jashtëm në koeficient të brendshëm nga firma e autorizuar. Për efekt të ndryshimit të koeficientit matësi u zerua, gjithashtu, janë bërë dhe sistemimet e diagramit në drejtimin e duhur. Në këto procesverbale është evidentuar edhe energjia elektrike e prodhuar dhe e konsumuar. Sa konstatohet nga procesverbalet e mbajtura ndërmjet palëve të sipërcituara, të katërta shoqëritë prodhuese kanë prodhuar një sasi energjie elektrike, fakt që vërtetohet dhe nga të dhënat e matësve të instaluar.

- Energjia e prodhuar nga shoqëria “Sun Beat System” sh.p.k., sikurse evidentohet në matësit e instaluar është lëvruar në sistemin e shpërndarjes duke filluar nga data 28.7.2022 deri më 8.11.2022 pasi këto njësi gjeneruese janë të lidhura në rrjetin 35 kV të energjisë elektrike që zotërohet dhe operohet nga shoqëria “OSSH” sh.a., kjo dhe për faktin se energjia elektrike as nuk depozitohet apo tjetërsohet.

- Këto parashtrime të “OSSH” sh.a. vërtetohen edhe nga shoqëria OST sh.a. me shkresën nr. 5980/2 prot., të protokolluar në ERE me nr. 1919/15 prot., datë 6.12.2023, ku në tabelën përkatëse në të cilën evidentohet se transmetimi i të dhënave *online* në platformën e marrjes së OST sh.a. për të katërta

shoqëritë prodhuese ka filluar në datën 8.9.2022, kur është instaluar edhe karta sim për transmetimin e të dhënave online të matjes.

- Rezulton se Kontratat për shit-blerje të energjisë elektrike ndërmjet shoqërisë FTL sh.a. dhe shoqërive Prodhuese me Përparësi të energjisë elektrike janë nënshkruar si më poshtë vijon:

- a) Kontrata ndërmjet FTL sh.a. dhe shoqërisë “Sun Beat System” sh.p.k. me nr. 906/1 prot.. Në këtë kontratë evidentohet se shoqëria “Sun Beat System” sh.p.k. dhe Ministria e Infrastrukturës dhe Energjisë kanë lidhur kontratën për ndërtimin, shfrytëzimin dhe administrimin e centralit gjenerues të energjisë elektrike fototvoltaike, me kapacitet prodhues 2 mw me nr. 3005 rep., nr. 1252 kol., datë 7.6.2022.

- Aktet ligjore përcaktojnë se energjia elektrike nga prodhuesit me përparësi nga burimet e vogla të rinovueshme nga dielli me fuqi të instaluar deri në 2 mw, me çmimin e miratuar nga ERE për vitin respektiv të nënshkrimit të kontratës/autorizimit nga ministria përkatëse. Rezulton se shoqëria “Sun Beat System” sh.p.k., është autorizuar nga MIE në vitin 2022. Bordi i ERE-s, me vendimin nr. 166, datë 28.6.2022, “Mbi përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli me fuqi të instaluar deri në 2 mw për vitin 2022”, ka përcaktuar çmimin = 97.21 euro/mwh.

- Në lidhje me aktrakordimit gjatë periudhës së mosmarrëveshjes, rezulton se shoqëria OST sh.a. nëpërmjet shkresës nr. 5980 prot., të protokolluar në ERE me nr. 1919/15 prot., datë 6.12.2023, si dhe nëpërmjet *email*-it të datës 6.12.2023, ka përcjellë në ERE informacionin e kërkuar të cilin e disponon.

- Gjithashtu, FTL sh.a. nëpërmjet shkresave me nr. 3408/2 prot., datë 21.11.2023, nr. 3408/1 prot., datë 21.11.2023, nr. 3368/1 prot., datë 22.11.2023, si dhe nr. 3408/5 prot., datë 24.11.2023, ka përcjellë dokumentacionin përkatës.

- Të dy shoqëritë kanë përcjellë aktrakordimet të cilat mbahen periodikisht me bazë mujore ndërmjet shoqërive OST sh.a., “FSHU” sh.a dhe “FTL” sh.a./“OSHEE GROUP” sh.a., për energjinë elektrike të transmetuar nga “OST” sh.a. për llogari të “FSHU” sh.a dhe “FTL” sh.a./“OSHEE GROUP” sh.a.

- Këto akt-rakordime janë mbajtur ndërmjet palëve për periudhat i. 1–30 shtator 2022; ii. 1–31 tetor 2022; iii. 1–30 nëntor 2022; dhe iv. aktrakordim i korrigjuar ndërmjet “OST” sh.a., “FSHU” sh.a dhe “FTL” sh.a /“OSHEE GROUP” sh.a., për energjinë elektrike të transmetuar nga “OST” sh.a. për llogari të “FSHU” sh.a dhe “FTL” sh.a./“OSHEE GROUP” sh.a., duke reflektuar vlerat e energjisë së prodhuar nga gjeneruesit në treg të lirë të lidhur në rrjetin e shpërndarjes për periudhën 1–30 nëntor 2022.

- Shoqëria “OST” sh.a. nëpërmjet komunikimit me *email* në datën 6.12.2023 (*dërguar me datë 6, 2023, 3:27 PM*) ka përcjellë në ERE komunikimet me *email* të realizuara nga “” sh.a. me bazë ditore nëpërmjet të cilave “OST” sh.a. njofton rregullisht çdo ditë përfaqësuesit e “OSHEE Group” sh.a./“OSSH” sh.a./“FTL” sh.a./“FSHU” sh.a. në të cilat evidentohet dhe prodhimi i energjisë elektrike i realizuar me bazë ditore përfshirë subjektin “Sun Beat System” sh.p.k.

- Shoqëria OST sh.a. ka realizuar procesin e matjes së energjisë elektrike të subjektit “Sun Beat System” sh.p.k., në zbatim të parashikimeve të ligjit nr. 43/2015, i ndryshuar, neni 76, “Matja e energjisë elektrike”, pika 1, citohet se “Operatorët e sistemit të transmetimit dhe të shpërndarjes janë përgjegjës për veprimtarinë matëse dhe shërbimin e leximit të matëseve të tyre përkatës”.

- Në zbatim të shkresës së dërguar nga Ministria e Energjisë dhe Industrisë me nr. 2510 prot., datë 8.4.2016, ku shprehet se: “të gjithë pikat e lidhura në tension 35 kV do të integrohen përkohësisht në platformën e menaxhimit të matjeve në “OST” sh.a.

- Pikat e matjes së subjekteve prodhuese për shoqërinë “Sun Beat System” sh.p.k., janë lidhur në rrjetin 35 kV, të cilat janë konfiguruar në platformën e menaxhimit të matjes në OST sh.a. në datën 8.9.2022, në përputhje me përcaktimet e sipërcituara.

- Shkresa dhe dokumentacioni i dërguar me *email* nga shoqëria “OST” sh.a., të lartë përmendura faktojnë që palët kanë pranuar energjinë elektrike të gjeneruar nga subjekti “Sun Beat System” sh.p.k., për periudhën 28.7.2022 deri më 8.11.2022.

- Nisur nga sa përshkruar më lartë, palët nga procesverbalet e përcjella mbi sistemin e matjes, aktrakordimet e nënshkruara ndërmjet tyre, dhe evidentimi me *email* të sasive të prodhuara të energjisë elektrike, kanë pranuar me veprime konkludente kontratën si veprim juridik, nëpërmjet shprehjes së vullnetit të tyre, bazuar në nenin 80¹ të Kodit Civil, i cili parashikon se: Veprimi juridik mund të kryhet me shkrim, me gojë dhe me çdo lloj shfaqje tjetër të padyshimtë të vullnetit, i cili sipas arsyetimit të vendimit të Kolegjit Civil të Gjykatës së Lartë të Republikës së Shqipërisë me nr. 11243-01443-00-2008 i regj. themeltar nr. 00-2013-763, i vendimit (172), ku parashikohet se: "...me shprehjen "shfaqje tjetër e padyshimtë e vullnetit", do të kuptojmë pikërisht, shfaqjen e vullnetit me veprime konkludente ose me heshtje. Një gjë e tillë parashikohet qartë dhe në nenet 669 dhe 676 të K. Civil, të cilat nuk bëjnë gjë tjetër, veçse plotësojnë kuptimin e nenit 80 të K.Civil."

- Në këtë kuptim dhe në përputhje me vendimin e Gjykatës së Lartë, fakti që sipas interpretimit të ligjit nr. 7850, datë 29.7.1994, "Për Kodin Civil të Republikës së Shqipërisë" i ndryshuar², konsiderohet si çasti i lidhjes së kontratës është momenti kur propozuesit i ka mbërritur përgjigja për pranimin e propozimit nga pala tjetër. Rezulton e faktuar dhe provuar që "OSSH" sh.a. ka instaluar sistemin e matjes dhe së bashku me "FTL" sh.a. kanë vijuar pranimin në rrjet të energjisë elektrike, i cili tregon qartë që ajo ka pranuar këtë propozim dhe ka qënë dakord me vazhdimin e këtij bashkëpunimi, me kushtet e mësipërme, në të kundërt do të kishte ndërprerë kryerjen e shërbimeve, pasi këta prodhues janë të lidhur në rrjetin e shpërndarjes së energjisë elektrike në nivelin 35 kV.

- Sa më sipër, shoqëritë "FTL" sh.a. dhe "OSSH" sh.a. duhet të marrin masat për rakordimin dhe njohjen e kompensimit të energjisë elektrike të prodhuar nga shoqëria "Sun Beat System" sh.p.k., për periudhën 28.7.2022 deri më 8.11.2022. Ky kompensim duhet të kryet me çmimin e energjisë elektrike të miratuar nga Bordi i ERE-s me vendimin nr. 166, datë 28.6.2022, "Mbi përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli me fuqi të instaluar deri në 2 mw për vitin 2022".

- Në vijim, ERE nëpërmjet shkresës me nr. 1919/10 prot., datë 23.11.2023 i kërkoi shoqërisë OST sh.a., të përcjell të dhëna nëse për periudhën 28.07.2022 deri 08.11.2022, shoqëritë "Tren Sun System" sh.p.k., "Sun Beat System" sh.p.k., "NTSP" sh.p.k., dhe "Korça Photovoltaic Park" sh.p.k. kanë pasur kontrata të lidhura dhe të deklaruara në "OST" sh.a. për shitjen e energjisë elektrike të prodhuar në tregun e pa rregulluar.

- Shoqëria OST sh.a. me shkresën nr. 5980 prot., të protokolluar në ERE me nr. 1919/15 prot., bën me dije si vijon: Për sa i përket deklarimeve të Njoftimit të Kontratave për periudhën: 28.7.2022 deri më 8.11.2022, kompanitë: "Tren Sun System" sh.p.k., "Sun Beat System" sh.p.k., "NTS" sh.p.k. dhe "Korça Photovoltaic Park" sh.p.k., nuk kanë deklaruar Njoftim Kontrate në OST sh.a. lidhur me transaksionet dypalëshe për shit/blerje në tregun me shumicë të energjisë elektrike. Këto subjekte prodhuese janë regjistruar si Palë Përgjegjëse Balancuese, pjesë e një grupi balancues konform akteve rregullatore në fuqi dhe kanë deklaruar njoftimin e parë të kontratës për shit/blerje të energjisë së prodhuar nga impiantet fotovoltaike në tregun me shumicë të energjisë elektrike në datë 9.11.2022.

- Ky vlerësim i përcjell nga "OST" sh.a. është një element shtesë i cili provon se përgjatë periudhës 28.7.2022 deri më 8.11.2022, shoqëria "Sun Beat System" sh.p.k., nuk ka pasur kontrata të tjera për të lëvruar energjinë e prodhuar përgjatë kësaj periudhe. Kjo energji është prodhuar dhe lëvruar në rrjetin e shpërndarjes ku dhe janë të lidhura këto subjekte.

- Në VKM-në nr. 456/2022, në nenin 12, përcaktohet detyrimi i shërbimit publik për blerjen e energjisë elektrike nga burimet e rinovueshme të energjisë për shoqërinë "FTL" sh.a. Gjithashtu, përcaktohet se Shoqëria Publike e Furnizimit në Tregun e Lirë, deri në krijimin e operatorit të energjisë së

¹ Neni 80, "Format e veprimit juridik", veprimi juridik mund të kryhet me shkrim, me gojë dhe me çdo lloj shfaqje tjetër të padyshimtë të vullnetit. Shkresa mund të jetë e thjeshtë ose akt noterial.

² (ndryshuar me ligjet nr. 8536, datë 18.10.1999, nr. 8781, datë 3.5.2001, nr. 17/2012, datë 16.2.2012, nr.121/2013, datë 18.4.2013, nr. 113/2016, datë 3.11.2016.

rinovueshme dhe krijimin e tregut të ditës në avancë, do ta tregtojë këtë energji për mbulimin e humbjeve të Operatorit të Sistemit të Shpërndarjes, me të njëjtin çmim me të cilin e blen këtë energji nga prodhuesit me përparësi të energjisë elektrike, deri në përfundimin e kontratave të shitblerjes së energjisë.

- Energjia elektrike e prodhuar nga shoqëria “Sun Beat System” sh.p.k., e lëvruar në rrjetin e shpërndarjes në të cilin janë lidhur dhe operojnë këto shoqëri dhe për të cilën nuk evidentohen transaksione me furnizues të tjerë të energjisë elektrike për periudhën 28.7.2022 deri më 8.11.2022, sikurse është bërë me dije nga shoqëria “OST” sh.a. është në përputhje me përcaktimet e VKM-së nr. 456, datë 29.6.2022.

- Për sa parashtruar, vlerësojmë se shoqëritë “FTL” sh.a., “OSSH” sh.a. dhe shoqëria “Sun Beat System” sh.p.k., duhet të marrin masa për të rakorduar ndërmjet tyre sasinë e energjisë elektrike të evidentuar në matës për periudhën 28.7.2022 deri më 8.11.2022, duke marrë në konsideratë procesverbalet përkatës të instalimit të sistemit të matjes. Në të njëjtën kohë, shoqëria “FTL” sh.a. duhet të rakordojë bilancin energjetik me “OSSH” sh.a. për këtë sasi energjie në përputhje me përcaktimin e mësipërm të VKM-së nr. 456, datë 29.6.2022.

Për gjithë sa më sipër, Bordi i ERE-s

VENDOSI:

1. Shoqëria “OSSH” sh.a., dhe shoqëria “Sun Beat System” sh.p.k., të marrin masa për të evidentuar sasinë e energjisë elektrike në sistemin matës të prodhuar për periudhën 28.7.2022 deri më 8.11.2022.

2. Shoqëritë “FTL” sh.a. dhe “Sun Beat System” sh.p.k., të marrin masa për të rakorduar ndërmjet tyre sasinë e energjisë elektrike për periudhën 28.7.2022 deri më 8.11.2022.

3. Shoqëritë “FTL” sh.a. dhe “OSSH” sh.a. të realizojnë rakordimet përkatëse në bilancin energjetik vjetor të vitit në vijim për këtë sasi të energjisë elektrike të prodhuar.

4. Shoqëria “FTL” sh.a. të njohë dhe të paguajë shoqërinë “Sun Beat System” sh.p.k., për sasinë e energjisë elektrike të prodhuar të evidentuar në sistemin matës, të rakorduar dhe të lëvruar për shoqërinë “OSSH” sh.a., sipas çmimit të miratuar nga ERE me vendimin nr. 166, datë 28.6.2022.

5. Palët subjekt i mosmarrëveshjes respektivisht, “OSSH” sh.a., “FTL” sh.a. dhe “Sun Beat System” sh.p.k., të marrin masa për zbatimin e pikave 1, 2, 3 dhe 4, brenda datës 31 mars 2024 dhe të raportojnë në ERE brenda 30 ditëve për ecurinë e zbatimit të detyrimeve sipas këtij vendimi.

6. Ky vendim është i vlefshëm vetëm për këtë rast të shqyrtuar.

7. Grupi i punës të njoftojë shoqëritë “Sun Beat System” sh.p.k., “FTL” sh.a. dhe “OSSH” sh.a. Ky vendim hyn në fuqi menjëherë.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të Bordit në rast se ka siguruar prova të reja që mund ta çojnë Bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETARE NË DETYRË
Erjola Sadushi